

Basef Ifimba Pol Nanda'ef Fagafe'ma Taitusi

Basef bandafi Pol nanda'ef fagafe'ma Taitusi

1:1-4 Pol na'ipa Taitus basef bu'wafi ma God noloma Jisas Kraiis nogatopalopana

1:5-16 Pol na'ipa Taitusa nondandepa anom agufumi siosi nonda'am walemb hielimbi esis Kristen sagapoma

2:1-3:11 Pol na'ipa Taitasa nogawalipasa basef Godi kofagefa endilisifi atifa hapifi poe esis Kristeni

3:12-15 Basef akutaifi

¹ Ae' Pol anda' maola Godi ea' ae' aposel Jisas Kraisi. Anen nandandepa ea' ma igawalipasa basef ananifi. Anen nasapa'e ma egewa' banaga esis amam nematawa mamahisa nandandepas ea' ananisii ma etopalopas sohapifana sogogawa basef endilisifi ma sigaila waf ananifi.* ² Ae' anda' maola agatopalopa hapif asasini ma esis sogawa ma sonohas sope sogohafa ambal alamba namili sogape andeande' lifilafi. Fowa' gani God ata' owa' nonda' anin mae netaga itap apa'ea, anen a' nali' na'ias ea' ma nogaso'apa ambal alamba apa'. Anen ina nagambaso'ami, owa'atin.* ³ A'i owa' main, nogota atamba anen atona nandandepata ea'i, anen a' nasa'ma amam amamba mogawalapa basef ananifii alihif. God anen nofa' apa' mogotanimai, anen na'ias ea' dei'

* **1:1:** Kl 1:27 * **1:2:** Ef 1:9-10; Ta 2:10, 3:4; 1 Ti 1:1,11

nase'e maol inimba ma egawalapa basef ifimba.*
 4 Ae' anda' basef ifimba fafe'mago ina' Taitus. Ina' nahapifa God ea' na'amba atin si'i apa' hia-pai magahapifana. Isimba atis dei' ina' nogame ae'inai endilisi. Ae' a'i God ahamapa noloma Krai Jisas anen nofa'apa mogotanimai, amom biam motopalopena dowaf nembel ine'imbili bepe sa'ombel.

Basef amom agufumi mugumafi esis Kristeni

5 Ae' akwahina napani Krita negandondomba maol inimba ata' owa' nimbifana ma atiasi nendandepa anom agufumi mugumafi esis Kristeni walemb hielimbi, si'i fowa' aga'ipina. Ea' basef amamifi fagape na'amba.* 6 Anona aman i'i owa' nonda' anef waf awafima naep esis amam nematawaia, ma anen noso' nemata'w atoto'w ma batawisana ananisi sohapifa Krai esis basef akasa, esis ina sonda' anef waf awafi, esis batawis sope andeande' sogame' basefi, dao' amom monda' waf na'ambai. Ina' nonda'am mope agufumi.* 7 Ina' negawa agufumi mugumafi esis Kristeni, amom mugumafi maol Godi. Ea' amam amambai fe' poe amamini andeande'ma atiasi esis amam nematawa ina solomam siti anef waf awafi amamifi, owa'atin. Anona aman ama amom agufumi, anen ina a' nonda' du'waniga, a okom wandafuna kwafalis, owa'. Anen ina nea' embel nohaga nogaol nohas atin, owa'i. Anen ina okom mohafel mi'imi'i a'owa' ma monda' waf

* 1:3: 2 Ko 8:23; Ga 2:3; 2 Ti 1:2, 4:10; Ro 1:7 * 1:5: 1 Ti 3:2-7;
 2 Ti 2:24-26 * 1:6: 1 Ko 4:1

awafi ma mogofa' otamba, owa'atin. ⁸ Anen nundumafi epes isimba mamahisa sugafi'i laugunii analemb walembi. Anen okom munda'i waf fasifi atef. Ea' nomonas sopaona mundumafi alop andeande' datima. Ma anen nigaila waf fasifi hiafi Godi ea' nope hilili'. Anen nundumafi okom ananiami atom datima andeande'.* ⁹ Anen nondahapila basef ifimba bu'wafi apa' magawalipasafi andeande'. Ea' anen la'ifinama nuwalipa anis epes nosa'ma ukup asasipi nogowa' banagasa basef ifimba usi'ifi. Ea la'ifinama niga'ipa isimba sogosambala basef usi'ifii ma sogameme'ma basef asasifi ina endilisifi, owa'atin.*

Anin ailan Krit anis epes sagambaso'ami sape

¹⁰ Aho', epes hiasi ina sagi'ma basef, owa'. Sosambalif. Esi sanda' basef dowaf sa'iam sambaso'ma anis epes. Esi hiasi wambota Judai sagatopa' alopi.* ¹¹ Esi sandanda' na'ambai, esi sa'i sombaso'mas sogofa'asa otamba moni mais anis epesi. Ea' sawalipa anisa waf afamba apa' mandaiwa'mafi. Esi sanda' waf afambai atef dei' sahambombaga wambotagw epes hiasi. Ea' ina' nesopama malogof asasigufi isimba sanda'am na'ambai. ¹² Fowa' anona aman Kritinai anen gawainai si'i profet, na'ias na'amba na'i, "Fowa' gani endilisi, esi Krit sape epes sagambaso'ami ea' dei' wapani ata' sape na'amba atin. Esi si'i mafis magail alupi awami. Ala'uta nahas a'owa', tol sa'oh dowaf ea' sa' gwa'aimi hiami."*

* **1:8:** 2 Ti 4:3; Ta 2:1 * **1:9:** 1 Ti 4:7 * **1:10:** Jo 10:12; 1 Pi 5:2; 2 Ti 3:6 * **1:12:** 2 Ti 4:2

13 Basef ifimba endilisifi. Ea' ina' nenda'epasef dindinipa, seme'ef sogogawa endilisi waf awafi asasifi ma ata' sogambema nelelemb. Ama hapif asasini ata' netaga negafe' usi'in.* 14 Ama esis sogakwaha basef mamimami falafumi esis Judai ma mu'uli epes isimba sogowa' alafugaha basef endilisifii.* 15 Ukup epes isimba nelelemb usi'ilimba waf fasifii, hiahawes hiasi hi'alas bo'wes hilili' ma esis. Apa' nomonas epes isimba nelelemb awasilimbi ma esis owa' soghapifa Kraisia, opalef asasilifi owa' anin mae be'ena, owa'atin. Ukup asasipi paloma malogof fagape opalef asasilifi nomoni a' awasim a'owa'.* 16 Malogof asasigufi saga'ias na'amba sa'i, "Apa' mogawa God." Apa' fe' asasini, nawalapa esis sogowa' alafugaha Godi. God anen nandaiwa'ma esis endilisi. Epes isimba sogasambala basefi, ina la'ifisa atiasi sonda' anef waf bu'wafi, owa'atin.

2

1 Apa' ina' ninda'ipa esis amam nematawa ma basef fasifi ma waf asasifi findaila basef ifimba usi'ifi. Ina' niga'ipas na'amba.*

Basef amam nematawa isimba hagasii

2 Amam hagami owa'i mea' embel mohaga mo-gaola. Amom ukup pendanda' andeande'ma waf usi'ifi hilili'i ea' nomonas sopaom mundumafi alop andeande' datima. Amom mondape andeande'ma hapif amamini negape bo'wen atina waf afamba ukup pandaimafi a waf afamba ukup

* **1:13:** 1 Ti 4:7 * **1:14:** Mt 15:11; Ro 14:20 * **1:15:** 2 Ti 3:5;
1 Jo 1:6, 2:4 * **2:1:** Ta 1:9

pigaila Godafi a waf afamba pigalutu banagepa ma nimanimi hiami.*

³ Ea' awo nematawa hagiwai wapani ondafe' usi'iwa hilili'. Awo owa'i ondaha basefa anis unda'i'ipamasa, owa'. Awo owa'i wea' embel hiambeli ohaga ogaola. Awo ondape si'i tisa nagawalipasa waf bu'wafi. ⁴ Awo hagiwai wihimba'ma nematawa awamba ata' sa'uwai kwasakwasalai ma onda' waf na'amba. Ukup awaupi pipila amom wahupawa awaumi moloma awasi awausi.* ⁵ Ea' awo undumafi nomonas awausi andeande'ma ogape bo'owa hilili' endilisi. Ea' undumafi ifagw awaugwi andeande' ma otopalopa amom mogoloma awasi awausi. Awo ondape lafela amom wahupawa awaumi. Awo ondanda' waf afamba hiafi bu'wafi hi'indalafa epes ina siti anin maol awauni awena sonda' basef Godi findiwaef, owa'atin.

Basef amom amam sa'umii

⁶ Ea' na'amba atin, ina' nesa'ma ukup amam amamba ata' sa'umi kwasakwasalai newa' banagama nomonas sopaom mugumafi alop andeande' datima.* ⁷ Ina' atina nenda' waf bu'wafi atefa amom mutilina ma mugailina monda' waf hiafi fasifi. Maol inimba nigawalipa epes, ina' owa'i ni'if feloma basef awafia, owa'. Ni'ipas basef bu'wafi endilisifi atif. Okom ine'imi mopoma waf usi'ifi atefa nenda' maol inimba nigawalipas dondol.* ⁸ Ina' ninda'i basef usi'ifi atifa, anis epes ina siti anef waf awafi ma maol inimba, owa'. Ama esis bousi atiasi sogofa'

* 2:2: 1 Ti 3:11 * 2:4: Ef 5:22 * 2:6: 1 Ti 4:12; 1 Pi 5:3

* 2:7: 1 Pi 2:15

ambagof awagufi. Dei' main, esis ina siti anef waf awafi ma afa' ma siga'i anif basef awafi, owa'.*

Basefa epes isimba agof akasi sanda' maol dowadowafi

⁹ Ina' a' ninda'ipa isimba agof akasi sanda' maol dowafi ni'ipas ni'i, esis some' basef agufumii silif sondafe' lafela amom. Ea' sondanda' maol bu'wani naninani hiani amom ukup paga'iani. Esis ina a' sogwa anif basefa agufumi sohalali'am, owa'.* ¹⁰ Esis ina a' sokwalopa anis hiahawes amamisi, owa'i. Esis sondaila basef amamifi andeande' datima. Ama atiasi esis sogafela agola basef ifi'i apa' magawalapefa esis epesi lu'wagol. Basef ifi'i Godi nowambilai apa' mutanimai mogape andeande'i.

Apa' mondape andeande' mosasa nemaf dembinai Kraisi

¹¹ Apa' mogawa okom Godi lu'unai nagana-gaila ape'i ma nagatopalopapa dowafi anamba nataga nandawalap ea', epes hiasi misi'ah hi-ahi agufisi saloma agof akasi hi'alas satolona. Ama nofa' apa' amam nematawa nokwahomapa waf awafi mutanimai mogafe'ma anen.* ¹² Waf God nagatopalopapa dowafafi fawalapa apa' ma mokwaha waf afamba mogowa' alafugaha Godi, ea' mokwaha nomonas amamba awami ma waf itapanai, apa' ukup pepe pendanda' pefe' andeande' mumafi alop ape'ipi mugaila waf Godi dei' nogota ata'e.* ¹³ Nogota atamba apa' mape masasa dagala anamba lu'unai mape

* **2:8:** 1 Ti 6:1 * **2:9:** Ta 1:3 * **2:11:** 1 Jo 2:16; Ef 1:4

* **2:12:** 1 Ko 1:7; Fl 3:20

mogohafanai. Aho', apa' mape mohafa glori banagami mogogala'i God Dembinai ape'inaf nofa'apa mogotanimai, anen Jisas Krai anaf no-taga nondawalap.* ¹⁴ Krai anen nakwaha ambal fasili ananili ma nagatala apa' natagwahepa ma waf aunai hianai mogosambala mu'uli Godi. Anen na'i nondombasa apa' ma mogataga epes ananipai atipa bu'upai, ukup pehafela monda' maol banagambela mogaila waf hiafi fasifi.*

¹⁵ Dondol ina' ni'ipasa basef ifimba. Ea' newa' banagasa sigailif ni'ipas dindinip si'i anona dembinai agol lu'wagilinai. Ea' nepa'aga waf nesa'ma ukup asasipi amam amamba owa' mugaila waf fasifia. Ae' andaiwa'ma anin epen niga'i ina' aman falafunai, owa'.

3

Apa' mundalutu banagepa ma waf fasifi

¹ Ina' dondol banagenama negasa'ma esis amam nematawa ma sogape lafela amom gavman dembami, amom banagami mugumafi esisi ma sogaila basef amamifi. Ea' esis sondandombola sonda' maol hiani fasini.* ² Esis owa'i sonda' anin epen findiwana basef awafia. Esis ina a' sifitap, owa'i. Sope opalef awanelef. Dondol esis sogape sonda' waf sa'umbelifi atefa epes hiasi.*

³ Ina' negawa fowa' apa' wapani owa' anis nomonas be'esa, apa' mogosambala basefi ea'

* **2:13:** Ga 1:4; Eks 19:5; Diu 7:6; Sam 130:8; Esi 37:23; 1 Pi 2:9

* **2:14:** 1 Ti 4:12 * **3:1:** Fl 4:5; Ro 13:1-7; 1 Pi 2:13-14 * **3:2:** 1 Ko 6:11; Ef 2:2, 5:8

Satan nambaso'mapa. Apa' mape lafela waf nan-inani aunai nelelemb mogohafema maemaefah awami ma alop sonogahap. Apa' mafe' maloma waf anamba ukup aoma anis epesi ma kowagalapama hiahaom asasimi. Esis sofala apa' naumbih asasipai ea' apa' wapani manda' naumbih malomas.*

⁴ Apa' God, anen nofa'apa mogotanimai ea'i, anen alipunai apa' epesi okom maimailapa. Nogota atamba waf afamba ananifi afataga fendasali alihif,* ⁵ anen ina okom mandanda'ma anef waf usi'ifi apa' manda'afi, dei' nofa'apai, owa'atin. Nomonas uwahipimi ananimitom nofa'apa mutanimai. Anen nasa'opapa ea' mataga awasi dambaipai, Ambal bu'unai Godi naso'apa ambal namili apa'.* ⁶ Ama maol Jisas Kraisi, anen aman nofa'apa mogotanimai, God naso'apa Ambal bu'unai ananinai nafi'i hiana a'owa' ma apa' si'i nagakolo'wai banagami ma apa'.* ⁷ Anen nanda'as na'amba ma naga'i apa' epes be'epa hilili'i ma okom anamba Jisasi atona lu'unai naganagaila ape'i. Ea' nandandepapa ma mofa' ambal namili mogape andeande' lifilafi. Ea' apa' mahapifana mape mosasam.

⁸ Basef ifimba endilisifi ma apa' hiapai mogahapifif. Ae' a'i newalapa basef ifimba ni'if dindinipa epes isimba sagahapifa God ea'i ukup pendanda'ma sugalutu banagesa waf fasifi. Basef ifimba ma Jisas Kraisi naloma God, ifimba bu'wafi ma fegatopalopa epes.*

* **3:3:** Ta 1:3 * **3:4:** 2 Ti 1:9; Ef 5:26; Jo 3:5 * **3:5:** Ap 2:17-18

* **3:6:** Ro 3:24 * **3:8:** 2 Ti 2:14,16,23

⁹ Apa' basef amamba mamimami iwanimi esis sa'iama sogosambala waf fasifii, sa'i sondahihi-anama saga'i agof hiagufi bafasas akupas asasisii dowadowaf, sogafitapa mu'uli fowa' God nagaso' Mosesani, amambai ina' nindihi'amam. Dei' main, apa' mogawa amambai ina motopalopapa magawalapa anef waf bu'wafii, owa'.*

¹⁰ Epen mamahina nanda' esis Kristen sandawal sagataga biafisi, inimba negesambala basef bu'wafii. Ina' nisindi'amona nomonas ananisi dindinip atetef a'a bif. Ama anin owa' neme' basef ine'ifia, dao' nekwahin newa'an alafuga.* ¹¹ Ina' negawa epen na'ambaini a' nakwaha ufa'w fasi'wi ea'. Waf awafi ananifi fihimba'mapa mogawa anin epen awani.*

Anif basef du'wanif akutaifi

¹² Anaf ae' i'i esapa' Artemas a'a Tikikus nogafe'mago ina', ina' ulal nifi'mai ae' mehipe wambel ambalemba Nikopolis. Ina' negawa ae' a'ias ea' ma igapani Nikopolis nogota atamba aotama asaf lu'wafi figalatai.* ¹³ Ina' numafi Senas nogogawa mu'uli esis Romi noloma Apolos andeande'. Ea' netopalopama hiahawes amom mofa'as mogafe' walemb hiagoma ma atiasi ina waowaola anis maefah ufa'w, owa'atin.* ¹⁴ Ea' esis Kristen amam nematawa ape'isi sondalafa waf sugalutu banagesafi ma maol fasini nani-nani sogatopalopa epes isimba hiahawes akasi.

* **3:9:** Mt 18:15-17; 2 Jo 10 * **3:10:** 1 Ti 6:3-5 * **3:11:** Ef 6:21-22 * **3:12:** Ap 18:24; 1 Ko 3:5-6; 1 Ko 16:12 * **3:13:** Ef 4:28; Ta 2:14; Mt 7:19

Na'amba esis Kristen tol sope dowaf ea' ukup pese'asa sonda' waf bu'wafi Godi.

¹⁵ Amam nematawa sape sagalome na'ai esis sandagala salomago ina'. Ina' nendagala nelomago epes mamahisa ukup pagapagaila afa'i sahapifa God sagalomafai. Ae' a'i God notopalopago ipa' dowaf nope nolomago ipa' hipai hi'ilipa nowa' banagaipa.

Basef ea' ma'uf.

Basef Bu'wafi Godi
The New Testament in the Mufian Language
Nupela Testamen long tokples Mufian long Niugini
copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 11 Nov 2022 from source files dated 9 Oct 2020

9d2b07f2-4ac7-545a-943c-e16df691ef3f